

Museo Numismático cu bunita coleccion di placa Arubiano



Desiree Croes, Directora di Museo Numismatico

ORANJESTAD (AAN)-- Museo Numismatico di Aruba recientemente a haya for di Koninklijke Nederlandse Munt un cantidad di monedanan di Aruba cu por wordo cumpra pa e publico cu ta bishita e museo.

Desiree Croes, Directora di MNA a informa pa DIARIO cu aña pasa nan a haya e bishita di representantenan di KNM caminda nan a keda masha encanta cu e museo, pero a wordo puntra riba e pakico e museo no ta bendiendo placa di Aruba.

Segun Croes, e motibo di esaki tabata pasobra MNA no tabata tin e manera pa cumpra esakinan y bende nan. Ta asina cu KNM a ofrece pa manda placa na e museo y ora cu e museo ta bende e placa aki, ta manda cierto cantidad cu ta Hulanda ta rekeri y asina por logra un ganashi pa e fundacion tambe.

E coleccion aki di monedanan arubiano ta hopi bunita y ta wordo bendi como un souvenir of como un regalo especial, ya cu e ta parti di nos

historia. E monedanan tin impreso riba dje e bestianan di Aruba manera e shoco, e pisca, e dori, e culebra, entre otro. Tambe, por haya monedanan conmemorativo na e descubrimiento di Aruba, ademá di setnan di placa cu no ta den circulacion for di 5 cent te cu 5 florin. E aña aki, e set di placa ta haci referencia na e historia di nos carnaval, cual ta un bunita souvenir pa e turistanan, como un recuerdo pa nos mes of pa nos sernan keri. E prijsnan di esakinan ta varia for di 55 florin te cu 96 florin, dependiendo di e valor di e placa y di e calidad di e silver, entre otro aspectonan.

E directora di e museo a manifesta cu nan a haya un carta di Koninklijke Nederlandse Munt caminda e museo a wordo designa nan como un "outlet" oficial pa e benta di e monedanan aki. E convenio ta encera cu ora cu e cantidad di monedanan cu e museo ta haya ta wordo bendi nan lo haya mas pa pone na disposicion di e publico.

Croes a indica cu awor nan a cuminsa cu e benta di e monedanan arubiano, pero talvez den un futuro nan lo tin e oportunidad di bende placa hulandes conmemorativo na e nacemento di Princesa Amalia, di Reina Juliana, di artistanan hulandes, entre otro.

Finalmente, Desiree Croes a señala cu den e momentonan aki e benta di e placa ta bayendo bon y e set di aña 2004 ta practicamente full bendi. A agrega cu ta espera cu dentro di un luna nan tin tur cos bendi caba y asina haya un cantidad nobo for di Hulanda.



TELEFONNAN DI DIARIO
582-6747- FAX 582-8551